

- प्रधानमंत्री नरेन्द्र मोदी री अगुवाई मांय व्ही केबिनेट बैठक मांय केई अहम फैसला लिया गया—राष्ट्रीय गोकुल मिशन ने भी मंजूरी मिली।
- राज्य मांय कोचिंग संस्थानां ने काबू करबा अर वां री जवाबदेही तय करबा खातर विधानसभा मांय विधेयक पेश— बिल माथे 21 मार्च ने चर्चा व्हेला।
- प्रदेश मांय 8वीं कक्षा री बोर्ड परीक्षावां काल सूं सरू— 2 अप्रैल ताई चालबा वाळी इण परीक्षावां खातर 12 लाख सूं बत्ता पढणियां पंजीकृत।
- जयपुर मांय आज सूं **एशियाई प्रशांत पोस्टल लीडर फोरम** री सरूआत व्ही—डाक नेटवर्क री मजबूती खातर देश—विदेश रा विशेषज्ञां रो मंथन।

000

प्रधानमंत्री नरेन्द्र मोदी री अगुवाई मांय आज व्ही केबिनेट री बैठक मांय केई अहम फैसला लिया गया। केबिनेट संशोधित राष्ट्रीय गोकुल मिशन ने मंजूरी दे दी। केन्द्रीय मंत्री अश्विनी वैष्णव केबिनेट रा फैसलां री जाणकारी देता थकां प्रेस वार्ता मांय बताया के इण मिशन खातर 3 हजार 400 करोड़ रुपया मंजूर कर्या गया है। वणा बताया के ओ मिशन दूध उत्पादन मांय सुधार लाबा माथे ध्यान देवेला। सरकार रा इण फैसला सूं देश रा सगळा पशुपालकां ने फायदो व्हेला अर वां री आमदनी बढेला।

केन्द्रीय मंत्रिमंडल देश मांय डेयरी विकास खातर 2 हजार 790 करोड़ रुपया मंजूर कर्या है। इण रे सागे ही कम कीमत रा भीम यूपीआई लेनदेन ने बढावो देबा खातर प्रोत्साहन योजना भी मंजूर करी गई है।

0000

केन्द्र सरकार आतंकवाद रे खिलाफ जीरो टॉलरेंस री नीति अपनाई है, जिण सूं देश मांय आतंकी घटनावां माथे घणी कमी आई है। आज राज्यसभा मांय गृह राज्यमंत्री नित्यानंद राय कया के सरकार **राष्ट्रीय जांच एजेंसी – एनआईए** ने और बत्तो मजबूत बणावे। श्री राय कया के केंद्र सरकार देश सूं आतंकवाद ने खत्म करबा खातर करड़ा कदम उठा री है।

000

उपमुख्यमंत्री अर उच्च शिक्षा मंत्री प्रेमचन्द्र बैरवा आज विधानसभा मांय राजस्थान कोचिंग इन्स्टिट्यूट नियंत्रण अर विनियमन विधेयक सदन मांय राख्यो। राज्य सरकार कोचिंग सेन्टरां रा कामकाज ने नियमित करबा अर उण री जवाबदेही तय करबा खातर यो बिल पेश कर्यो है। बिल माथे 21 मार्च ने चर्चा व्हेला। श्री बैरवा कया के इण बिल रे जरिये कोचिंग संस्थानां रा पंजीकरण, संचालन, फीस अर शिकायत निवारण प्रक्रिया समेत केई पहलुआं माथे करड़ा नियम लागू करबा रो प्रस्ताव राख्यो गयो है।

राजस्थान भू-जल संरक्षण अर प्रबंध प्राधिकरण विधेयक 2024 भी विधानसभा मांय राख्यो गयो, जिण ने दुबारा प्रवर समिति रे कने भेज दियो गयो। सदन मांय आज इण बिल माथे व्ही बहस रे पाछे जलदाय मंत्री कन्हैया लाल चौधरी बिल ने प्रवर समिति ने भेजबा रो प्रस्ताव राख्यो, जिण ने सदन मंजूर कर दीनो। विधानसभा मांय अवैध बजरी खनन रा मुद्दां माथे भी हंगामो व्हीयो। इण दौरान पक्ष अर विपक्ष रे बीच तीखी नोकझोंक व्ही। शून्यकाल मांय नेता प्रतिपक्ष टीकाराम जूली स्थगन प्रस्ताव रे जरिए मामलो उठाता थकां कया के प्रदेश मांय ठोर-ठोर अवैध खनन व्हे रियो है। वे कया के हाईकोर्ट ने

टिप्पणी करनी पड़ रही है के राजस्थान पुलिस इमदाद नी करे तो सीआरपीएफ री इमदाद लेणी चाहिजे, इण सूं बड़ो उदाहरण और कांई व्हेला। कुछेक देर रा हंगामा रे पाछे विपक्ष सदन सूं वॉकआउट कर गयो। संसदीय कार्य मंत्री जोगाराम पटेल कया के विपक्ष बिना वजह सदन री कार्यवाही मांय अड़चन डाल रह्यो है।

000

टी.बी. मुक्त भारत अभियान रे तैत केई कदम उठाया जा रह्या है। देश मांय 347 प्राथमिकता वाळा जिलां मांय 100 दिनां रो गहन टी.बी मुक्त अभियान जारी है। राष्ट्रीय स्वास्थ्य मिशन री कानी ऊं राष्ट्रीय टीबी उन्मूलन कार्यक्रम पूरा देश मांय टीबी रा मामला रो बेगी पता लगाबा, उण री रोकथाम करबा अर टीबी रा नुवा मामलां ने रोकबा रा लगस सूं लागू कर्यो गयो है। टीबी ने खत्म करबा री कोशिशों रे तैत नुवी दवा प्रतिरोधी उपचार पद्धतियां सरू करी गई है अर **नि-क्षय पोर्टल** रे जरिये टीबी रोगियां माथे लगातार निजर राखी जावे है। प्राथमिकता वाळा जिलां मांय टीबी रोगियां री देखभाल खातर 826 दवा प्रतिरोधी टी.बी उपचार केन्द्र थापित करया गया है। प्रदेश मांय भी टी.बी उन्मूलन माथे तेजी सूं काम कर्यो जा रियो है। इण खातर सामाजिक संगठनों रे सागे जन भागीदारी ने भी शामिल कर्यो गयो है। पाली जिला कलेक्टर एल एन मंत्री टीबी उन्मूलन रा लगस ने हासिल करबा खातर सगळा लोगां सूं हर भांत री इमदाद देबा री अरज करी है।

000

प्रदेश मांय आठवी कक्षा री बोर्ड परीक्षावां काल सूं सरू व्हे री है। राजस्थान माध्यमिक शिक्षा बोर्ड री कानी सूं ली जाबा वाळी ये परीक्षावां 2 अप्रैल तांई चालेला। ये परीक्षावां एक पारी मांय दोपहर 2 बज्यां सूं सिज्यां साढे चार बज्यां तांई व्हेला। इण परीक्षावां खातर राज्य मांय कुल 9 हजार 824 परीक्षा केन्द्र बणाया गया है। वटी ने 12 लाख ऊं बत्ता पढणियां आ परीक्षा देवेला।

000

जयपुर मांय आज सूं एशियाई प्रशांत पोस्टल लीडर फोरम री सरूआत व्ही। तीन दिन रो यो फोरम यूनिवर्सल पोस्टल यूनियन (यूपीयू) अर डाक महकमा री कानी ऊं राख्यो जा रियो है। डाक हलका री खास चुनौतियां रो हल काढबा अर साझेदारी रे सागे डाक नेटवर्क ने मजबूत करबा खातर यो फोरम राख्यो गयो है। इण मांय एशिया प्रशांत हलका रा 30 देशां रा डाक अहलकार विशेषज्ञ अर सदस्य भाग ले रिया है। केन्द्र सरकार री डाक महकमा री सचिव वंदिता कौल उद्घाटन सत्र मांय शामिल व्ही। मीडिया सूं बातचीत मांय वणा कया के फोरम रे जरिये आपसी तालमेल ने बढ़ावो दियो जा रियो है अर एक दूजा सागे अनुभव साझा करया जा रिया है। वटी ने भारतीय डाक संघ रा अहलकार ठाकुर सुभाष सिन्हा बताया के विश्व डाक संघ री कानी ऊं पैली बगत जयपुर मांय इण भांत रो आयोजन कर्यो गयो है। वणा बताया के भारत रो डाक नेटवर्क दुनिया रा बेहतरीन तंत्र मांय भेलो है अर लगातार इण रा कामां मांय बढ़ोतरी व्हे री है।

000

झालावाड मांय काल सूं स्वास्थ्य सप्ताह मनायो जावेला। राष्ट्रीय मुख स्वास्थ्य कार्यक्रम रे तैत काल सूं जिला मांय केई कार्यक्रम व्हेला। इण सप्ताह रा आयोजन **हेपी माउथ इज ए हेपी माइंड** थीम माथे कर्या जा रिया है। इण दौरान जिला रा सगळा सरकारी सफाखाना मांय मूंह रा रोगां सूं जुड्या शिविर लगाया जावेला।

000

झुंझुनूं मांय आज रोजगार मेळो राख्यो गयो। जिला रूजगार अहलकार दयानंद यादव बताया के करीब साढे 600 मोट्यार मेळा मांय भाग लीना। इण मांय न्यारी न्यारी कम्पनियां री कानी ऊं 385 मोट्यार रो चुणाव नौकरी खातर कर्यो गयो।

000

भीलवाडा जिला रा शाहपुरा मांय आज अंतर्राष्ट्रीय फूलडोल महोत्सव पूरो व्ह्यो। रामस्नेही संप्रदाय री कानी ऊं राख्या गया तीन दिन रा इण आयोजन मांय न्यारा न्यारा धार्मिक कार्यक्रम अर व्याख्यान व्ह्या। इण दौरान रोजाना शोभायात्रावां काढी गई। महोत्सव मांय बड़ी संख्या मांय देश-विदेश रा श्रद्धालु शामिल व्हीया।

000

प्रदेश मांय काल सूं मौसम मांय एक बार फेरु बदलाव रा आसार है। एक नुवा पश्चिमी विक्षोभ रा असर सूं राज्य रा उत्तराद हलका मांय कठे-कठे मेह बरस सके है। बीकानेर, जयपुर अर भरतपुर संभाग मांय कुछेक ठोडां माथे भी छितरायो मेह बरस सके है। पश्चिमी विक्षोभ रो असर जयपुर अर भरतपुर संभाग मांय 21 मार्च ताईं बण्योडो रह सके है।

0000

नई दिल्ली मांय काल सूं **खेलो इंडिया पैरा गेम्स** व्हे रिया है। ये खेल 27 मार्च ताईं चालेला। युवा मामला अर खेल मंत्री डॉ. मनसुख मंडाविया कया के खेलो इंडिया पहल एथलीटां ने एक उल्लेखनीय मंच देवे है, जिण सूं विश्व स्तर माथे देश रो मान बढेला। वणा **पैरा इंडिया गेम्स** रा प्रतिभागियां ने शुभकामनावां दी। श्री मांडविया कया के **खेलो इंडिया पैरा गेम्स** मांय 1300 सूं बत्ता एथलीट भाग लेवेला।

000